

四庫全書

集部

欽定四庫全書

文苑英華卷七百七十六 宋 李昉等 編

頌德下

唐劍南東川節度使鮮于公經武頌一首

唐檢校右散騎常侍容州刺史李公去思頌一首

陵煙閣勲臣頌二十二首

陵母頌一首

唐劍南東川節度使鮮于公經武頌

于邵

皇唐八葉伐叛取亂再寧區夏四海絕橫流九州無匪  
人制要荒以從述職分周召以相夾輔有多士為內理  
有方鎮為外攘垂衣裳而御極惟十有三祀矣大劍之  
南自秦惠䟽疆是一都之會南蠻西戎舊為敵國伺我  
休戚為爾進退國家之有天下也或懷柔羈縻與之連  
和或掩義背德與之交鋒尋盟問罪不無事矣當天寶  
中河隴之外却地千里赤山青海不敢芻

一作致飲

牧絕漠

無跡我嘗有之屬燕薊猾亂毒痛生人羣盜乘時疊彼  
戎復舊怨是以綠林逋藪白晝殘人池隍鞠為茂草邑  
里化為煨燼墜瓦萬聚頽垣一平大厯三年夏六月分  
命漁陽伯鮮于公擁旄仗鉞總統東川八州之地自閩  
之外帝俞欽哉公才包五行體含四氣揮若神劍扣如  
鴻鍾其始也凜之以威其漸也濟之以恩作之君師為  
之父母由是遠者來來者安也於是驅豺狼之所嗥剪  
荆棘之所蔽一之歲二之歲葺郡邑正疆理而樹牙幢

三之歲四之歲闢田疇鬻帑藏而耀軍實五之歲而甲

兵大振六之歲而勇可賈餘七之歲而人有取

疑作聚

訓

有常矣無暴可禁所謂保大定功有財

疑作才

斯豐所謂

安人和衆兼之者不戰而勝兵將戢乎畿內諸侯始有

賴而捍戎於邠隴矣則知漁陽公外陳藩屏而助威武

於鑠哉其為人臣之式歟方今龍安屬邑久為重門待

暴之地壤連西山分我天限有間道可以招戎偵有絕

險可以資敵國去年發中軍之卒為之鎮守今秋自元

戎十乘以先啟行白露始降秋草方實勦角勁而膂力  
既堅樵蘇積而糗糧斯峙如熊羆曰千夫長如貔虎曰  
百夫特前矛一作後勁不戮一人君子曰軍政不戒而

備矣以此料敵兵必勝戰必克我武惟揚休有烈光福  
履所將壽考無疆其猷克壯而佐堯翊湯不其盛歟公  
名晉字叔明漁陽燕人也其先殷人箕子處其地世有  
君長北方之強歟至西漢有京兆尹褒惠東漢虎牙將  
軍輔散遷伊洛相衛之間垂裕後昆繼世流慶粵有高

祖父康紹後牧于閬解印寓於新政縣伯會

二字一作泊

曾

王父與王父因家焉衣冠未裔松檟斯茂實膏腴而止  
斯樂土正版圖而終移闕內今復為長安人也公先兄  
仲通擢桂枝綰黃綬不十年而權生殺於梁益之地入  
為京兆尹公自孝廉專經高第再叅環衛累拜棘司四  
遷柱史連擢華省宰洛邑時號神明牧商於人歌父母  
有詔加金商均房等州觀察使處置使又入為京兆尹  
歷左右宮相出牧臨邛兼御史中丞充邛南招討都團

練使由中司復加節制焉尋遷御史大大朝廷以為今  
之二難時也卓絕載形詔旨談者榮之方將登金鋪調  
玉鼎徼蒼生之福豈懾殊俗收係虜從衛霍之事乎邵

忝嘉賓

一作板

之末猥廁諸侯之選拜賜之辱奉以周旋

頌聲不作無以報德發彼馨香存乎琬琰匪報也永以  
為好遂作頌曰金火間秀實生有德風雲所感以佐王  
國龍韜豹畧天資默識敦詩閱禮行有餘力忠於事君  
立名底績鴻鵠斯舉驂駟登跡風雨如晦我心匪易三



川震蕩萬里沙磧宗社既安君臣正焉乃睠西顧實維  
東川東川伊何人其播遷邑有遺洛家無舊阡爰命虎  
臣仗茲犀節上天下地惟爾之發拉一作招彼羣逋輯我

遊闕躬之先之不日不月七載勤勸三軍克振龍安之  
役伐原示信么戎宣驕則我觀豐王帳潛機金鉦俟進  
漢恩營平先零之功班壯車騎燕然以封軍之一作從軍之  
所樂吾之所從門生獻頌豈二子之所疇庸哉

唐檢校右散騎常侍容州刺史李公去思頌并序

前人

維貞元二年秋八月天子以郡國二千石之高第者曰隴西李某字某利澤施於喬土美化被乎遐毗是用遵虞書陟明之義叅周官進律之典俾之由檢校右散騎常侍兼御史中丞容州刺史本管經畧守捉招討處置等使為御史大夫嶺南節度經畧觀察處置等使實授兵符加擁使節某月自合浦如南海於是縣道谿谷鰥寡孤老泪于士吏相與懷思隱然不去乎心森然不離

乎目願所以昭明其德光示于後嶺南經畧使判官權

知容州留後事監察御史震行同郡李牢

一作字

始以文

學居辟選之首遂叅帷席復以謀能當器任之重留總

軍府美公之政大備感公之禮有加因其人之請而上

之上可其奏夫其郡之四封濱于百越外則有山寇海

孽比境雜處之虞內則有勤戍勞師流散轉死之弊親

師其下以撫吾人慰薦傷夷安集疲

一作罷通用

耗懼貨貢

之闕至助之以家財憫徃事之繁至代之以私屬選武

藝歸老疾罷減塞卒四千餘人以趨農時率浮情闢汙  
萊開置屯田五百餘頃以足軍實舍寇賊之為縲囚者  
釋而遣之以除其怨而狙獷以順禁人民之相虜賣者  
執而誅之以去其害而童昏以安常歲有災濫災而連  
燒于廬舍公創其制以禦其鬱攸而邑居以葺舊俗多  
怨睚眦而致毒于飲食公立其防以解其恟忿而鄉黨  
以和樹枝幹而啟閉畢脩列亭燧而厄害斯控差重輕  
以行徵令無不均之譏量遠近以納貢職無不供之責

人用富庶家有儲峙敦之以禮懷之以仁潔已而不汚  
未嘗有賁貸勤身而不怠未嘗有懈弛明足以照遁情  
隱慝而不為察威足以制猾人暴吏而不為苛古之良  
能何以加此其人之獻狀云耳惟公我有唐宗室枝屬  
之選鹽州刺史諱孝誥一作先府君之曾孫弘農郡太守  
諱璟府君之孫太子太傅贈司徒諱齊物府君之子洪  
緒丕績之餘裕弘休純懿之下鍾寬博而柔良高明而  
踈達根於經義飾以藝文故其仕王畿宰京邑累執憲

簡且登輶車備重臣賓介之職居大府紀綱之任三亞  
京尹兼中司之貴復為宮相在常伯之位歷饒州刺史  
而後至於是州恩結於人功加於物必聞理效而興頌  
聲且夫有美焉有刺焉詩人之義也善善而褒之惡惡  
而紕之春秋之事也使賢士大夫之事業不沒於後太  
史公之制也以余之嘗脩史記而為訓辭緣人之懷心  
而頌之曰

帝念南方迫界蠻夷人新被寇歲或勞師屬之於公俾

養牧之匪直勤身亦帥其屬贍我貧匱宇我憚獨息人  
便農墾田積粟脩其教化被以威德賊害既除禍災斯  
息完我廬舍親我骨肉咸保其生且易其俗蚩蚩羣族  
孰不蒙福播為頌聲公受百祿彤弓旅矢以長諸侯人  
之懷德刊石垂休

凌煙閣勲臣頌

文粹  
作讚

二十二首

并  
序

呂 溫

我二后受成命撫興運轉坤軸撼乾樞鼓元氣而雷域

中騰百川而雨天下雲收雨霽如再開闢蕩蕩焉與太  
極同功貞觀十七年太宗以功成理定秉為而不有之  
道讓德於祖考推勞於羣臣念匡濟於艱難感風雲於  
疇昔思所以攄之無窮乃詔有司擬其形容圖畫於凌  
煙閣者二十有四人蓋象乎二十四氣之佐天生物

文粹

集本無此二字

昭勲德也昔者舜以九官

文粹作五經

致理周以十

亂反正高皇

文粹作祖

以三傑祚

二本作祚或作祚

漢光武以二十

八將中興若夫錯綜勲賢牢籠今古雄四代而高視者



其唯聖唐乎至若唐莒公劉渝公之倫探元符建帝圖  
首戴神堯舉晉陽而活天下此則大禹之拯溺也魏鄭  
公以致君為己任諫若不及蹇蹇左右秉心宣猷此則  
咎繇之颺言也虞永興糾合羣儒旁求百代明備王禮  
克諧帝樂使我大國煥乎其有文章此則夷夔之制作  
也長孫趙公舉大義除二寇安宗廟定社稷以振我丕  
赫無疆之休此則周公之匡救也英衛受天勇智雄武  
佐聖鼓行海內摩定四方此則太公之鷹揚也房杜立

機朗識並運帷幄神發響効暮成天功此則蕭何之指  
縱子房之決勝也尉遲秦程剛毅木訥氣鎮三軍力崩  
大敵匹馬孤劍為王前驅此則吳漢之樸忠賈復之雄  
勇也其餘皆棖棟殊材黼黻異制儔諸古烈罔有慙德

皇王之業

集作際

於斯為盛其始也文為經武為緯智斯

作忠斯述其末也大不偏小不遏退者全來者達控而  
縱之使自用之推而引之使自盡之不設籠檻以觀寡

集作途

廊之致不頓韁鎖以極權奇之變執一德而衆力

展懸大信而羣情竭高祖聚之以義大宗用之以道高宗終之以仁傳聖萬代享其功利此非盛歟昔陸機袁宏為晉人而歌功於漢魏作者猶或稱之况乎遊聖代觀國光目睨凌煙而頌聲不作某不揣賤劣有疊

文粹作斐

然之志輒盡所蓄各為讚一章上以見王業之艱難中以明聖賢之相須次以朗前哲之光韻末以聳後人之盛節侯君集張亮負勲跋扈自陷大逆敢沒其名用彰天罰

二本  
作刑

使伐勞懷貳者懼春秋之義異姓為後故以

河間元王為讚首云

河間王孝恭

太極構天本由一氣大人創業資我族類堂堂河間仁

勇是經通駿有聲為唐宗英暴隋天亡羣盜猖狂我伐

用張時惟

文粹  
作繼

哲王武有烈光為爪

文粹  
作翼

牙肺腸經綸

八方自南徂東晏海澄江

平有銑  
輔光祐

使我父

二本作  
使父兄

帝天

下化家為邦用竭爾力寵臻其極言不伐色不德以遜

以默柔嘉惟則佐高祖建大勳如周旦爽與太宗守大

成如漢間平宜君宜王盤石無疆

房梁公玄齡

梁公先覺龍卧待君長彗流光掃天布新義師雷興公  
躍其鱗杖策千里來排帝閭婉婉梁公實懿實聰實光  
實融羽翼義忠若鸞若鴻大風動地儒服從容靜運胃  
中弛張折衝左右太宗夷屯廓蒙定高祖功告武成  
翊開太平我雖忘勞時靡有爭網羅遺賢推轂羣英玉  
不韜光

文科  
作輝

蘭無沉馨飛鴻出冥振鷺在庭濟濟多士

太宗以寧太宗寧矣

文粹無此四字

公無事矣闕袞有補惟仲

山甫經營四方方叔邵虎大邦鈞軸至則委汝閑居台

輔揮

二本作搗

默自處亦莫敢余

一作余敢

侮高朗令終於

二本作鳴

呼梁公

杜萊公如晦

穆穆萊公竒資粹靈蘊元和氣為大國禎乘時能恢

文粹

作恢能

唐室天

文粹作大

開故人相携

少與房梁公同有匡濟之志也

直上秦

階更為陰陽迭作日月佐明四海贊育萬物二人同心

王度是欽如玉如金德音悻悻萬有千古永稱房杜如

周中甫

魏鄭公徵

堂堂魏公崇節大志喬幹直聳摩天自致遭風雲時得

霸王器一言委質有死無貳一本作二撫我則后各盡其志

嘗事隱太子李密也

沉浮變通吾道不窮龍戰既息皇建其極俾

補衮職其繩則直諤諤疑疑危言正色保太宗德弼違  
替否日月不蝕黜漢霸雜行周王道人或有言秉德不

撓

與封德  
彝廷論

禮興樂崇德洽道豐保合太和昭明有融起

四年中復三代風言出化成神哉厥功尹躬佐商有耻

于湯公以其心

文粹  
作志

匡飭

文粹  
作錦

聖唐為唐宗臣致唐無

疆致唐無疆永式萬邦

長孫趙公無忌

趙國之先發祥朔土乃祖乃父受天之祐有女而聖

文德

皇  
后

為天下母有子而賢為唐室輔聖賢同契

文粹  
同氣

千載

一覩丕顯趙公允文允武克忠克仁實有大勲高祖受



命太宗歸尊翼翼乾乾恪居于藩羣孽亂嗣爭窺神器

鴻業將隆公揭大義一匡天地人到于今家受其賜帝

將傳聖爰有顧命汝忠汝誠莫與汝京與我聖子守唐

太平公相高祖有太宗餘二本風刑措財豐八荒來同

和氣大融妖星襲月一作禍起中空公將正言集作以

正集作帝躬武氏謀位力屈羣邪誠阻天聰黜非其尤

令問無窮

唐莒公儉

歲寒陰凝冰雪皚皚有鳥擇木先陽春來猗與莒公王  
佐之才間運未開登潛龍臺代萬一本作百姓請命與天為  
媒扶龍而興振起雲雷權輿帝國經始唐基始覆一簣  
勃焉魏魏易失者集作月時難知惟幾知幾其神莒公元  
勲

劉渝公政會

河出崑崙來潤中夏連山合沓橫擁其派巨靈勃然手  
拆文粹作擘太華決流東注功並造化粵我聖唐將舉晉陽

帝命是將往拯溺于四方亦既載旆亦既秉鉞強克當

路

王威高  
君雅

拒不得發渝公慷慨感義激節用奇制變大

事立決雷奮電

文粹  
作定

越天衢八達則莫我敢遏如巨靈

破山河勢始豁赫矣渝公與神齊烈跡如仙掌炯炯不  
滅

李衛公靖

有隋之末羣盜熾熨帝怒震發五星從太白煥照參野  
將有聖人兵定天下金精下射猛毅感激李公矯矯從

此奮跡躍于中原王者則

集作自

獲壯士不死

初公不利於我帝戮

之壯其言而免壯士云自稱云

唐威載赫帝曰汝傑致天之罰手付金

鉞俾往式遏不庭則殺如颶發發如火烈烈推枯爍雪  
應鼓如截遠若荆巫險若江湖強若匈奴莫不率從莫  
不震恭車書混同氛祲蕩空衛侯之功效則維何威明  
惠和策勇駕智長驅仁義仁義曠蕩帝王之將萬古式

二本  
作曠

瞻鐵山峽巖

詔築墳闕象鐵山積石山峽巖一作峽巖

李英公勅

橫流莫極大亂無象英公傑出應運為將與楚楚霸與

漢漢王天時人事隨我所嚮長蛇縱壺王世充東據河洛

婁婁封豕

建德

來濟同惡虺

二本作號

吼連聲如雷如霆萬里

震驚時維英公諒我太宗斬豕以鉞取蛇于穴羣穢殄

滅乃定九鼎乃開明堂奄有大邦金甲同光告成于皇

太宗獻捷于高祖與勳探金甲為上下將

皇業用昌帝命英公北伐獫狁雷

鼓殷殷旄頭幾殞掃雪

文粹作雲

黑山布唐陽春五原草綠

不見南牧烏夷未庭天子親征其鋒維英莫拒莫抗是

震是蕩破東海浪天下既和解鞍投戈袞服委蛇華髮  
皤皤始終三朝無玷可磨

劉夔公弘基

夔公崢嶸金虎之精應時而生與運俱行總帝元戎震  
唐天聲瞑目張膽前無金城別建龍節中分虎旅啟行  
萬里乘氣一鼓劍揮雷電

二本  
作定

旆卷風雨先馳咸陽鎮定

天府天府既定唐集大命入揚王庭出握

文粹  
作權

兵柄薄

伐獫狁朔風不競徂征島夷東海如鏡義始忠卒元勲

之盛

長孫邳公順德

泰山未明雲鬱幽崖日觀赫間舒為丹霞昔我太原賢  
傑潛屯帝出于震爛其盈門邳公炳焉實耀其間功叅  
造化謀協先天執爻前驅捧轂南轅以榮以舊佐命之  
先

虞永興公世南

英英永興華德素行以文富國以道佐命天下既定為

唐儒宗東觀石渠始生

出 集作

古風秉精驛

文粹作 緝

思假道

書圃馳騁

文粹作 驅

百代出入三古開

渠作 問

羲皇心聽堯舜

語歸來帝側獻可替否帝告永興與鴻碩之倫闢六籍

三墳建樂章禮文先師是宗先聖是崇於廓辟雍辟雍

沉沉天子所臨或絃或歌講古述今其徒八千纓弁森

森獬豸羗鬚咸詠德音羽林孤兒亦垂青襟洋洋聲教

無遠不洎日月所照皆成文字鬱開古始掃蕩澆季實

我羣儒成太宗之志英英永興宜曰文懿

公 謚



尉遲鄂公敬德

洗洗

文粹作  
洗洗

鄂公百鍊龍鋒

文粹  
作泉

沉翳未宣氣衝斗間

佩非其人

初事  
金剛

躍入大川神武獲馮提之上天天地之

內指麾無前熊威虎力隱若敵國剛毅木訥安劉必勃

武德之屯手拔禍根掃除氛昏捧出白日

文粹作  
日月

耀乎

天門功成名遂高謝戎事烈烈猛志化為和氣深地高

堂願性保常肩瓊飲露靜奏清商商為臣勵事君鄂公

之德之勲

貞觀後公不交人事常鍊氣服食奏清商  
之樂以日奉之德之勲二本作之志之仁

蕭宋公瑀

隋氏不君忠賢莫用桐生朝陽有集惟鳳捨彼頽厦鬱  
為新棟輅車玄袞開國有宋武德之暮羣孽內蠹巍巍  
宋公聳節高步不吐不茹不來不去屹岨文粹作岨中立為

天一柱從容而言社稷遂安持誠秉忠光輔二君激濁

揚清育

集作欲

人如身道至廣莫我敢羣境至大不容纖

塵雪山倚空冰壑照人耿介絕鄰文粹作倫為唐貞臣

張鄭公公謹

有倬鄭公伉伉而仁

二本作貞

洗洗

文粹作洗

而純

二本作仁

實太

宗信臣太宗守藩內難未夷圖之則安捨之則危帝臨

安危機

二句一本作圖之則危帝臨危幾

以懼以疑以著為有

文粹作先

知

是筮是咨鄭公巖然排闥折著抗憤正詞用人事定天  
意身為元龜不識不知順帝之則以定社稷鄭公之力  
公之云亡帝念其勤若痛在身天懷發中哭不避辰君  
臣之間竄古未聞

屈突蔣公通

五運相推土火革期隋化為唐忠臣不知猶驅義徒奮

拒王師指心誓天摩頸待時人歸有德四海皆叛春日

滿川孤

文粹  
作流

冰未泮亡家徇國方寸不亂力屈勢窮排

空落翰東南慟哭血

文粹  
作聲

盡魂斷伏忠就擒萬國瞻嘆

帝曰爾通古之烈士孝子其親誰不欲子俾侯于蔣授  
以師紀感恩不死宣力如彼佐唐扶隋名教之美

### 高申公士庶

維岳降神佐唐生申忠貞自天孝友如春德為邦基行

文粹  
作仁

厚人倫肅肅雍雍真王者臣慶因歸妹光誕

集作  
延

天配

文德皇后公之同  
出德文粹作懿非

婚媾之中雲龍潛會建功

二本  
作公

南海廓我無外諒武撥亂弼文開泰過

文粹  
作過

彼庸蜀荐

鍾澆季文翁之化若掃于

一作  
於

地中公攸徂有教無類

父子兄弟望風相媿勃興儒雅大復禮義西南頌聲到

今不

川文粹  
作木

墜名登元勳理冠羣吏全材大器於鑠厥

懿

殷勛公開山

溫溫殷公初若懦夫銅印試吏袞衣為儒大風驅雲忽  
與之俱遭逢真宰叅造化暮天地既闢厥功有赫從王  
龔行佐帝光宅遠展驥足高揮鳳翮以永終譽垂于竹  
帛

秦胡公叔寶

洛汭之役龍戰未決

王世充與我師陳于九曲

秦公應變臨陣電拔

銳氣盡來我盈彼竭成敗反掌存亡奄忽虎來風壯鼉  
轉山沒遂作心膂爰從討伐崩圍陷陣火迸冰裂翕如

鷲聳縱若鯨突功成國定萬古壯骨

程盧公知節

盧公倬然動軼幾先轉禍為福

與秦胡公降于九曲

攀龍上天續

翻鵬翼積風乃聳桓桓將軍大敵則勇雷崩山谷貔虎  
頓伏颺倒溟波鯨鯢蹉跎見危而進當死不讓干城三  
朝身老氣壯

段褒公志玄

褒公虎臣先運而臻謁帝大原許唐以身挺

集作擁

劍駕

氣騰風躍雲積忠累仁光有厥勲建旄

蜀本  
作旄

北伐細柳

宵屯風謐霜凝嚴扃達晨天子之使駐車軍門

軍屯  
肅  
章門乃

外壁門以夜  
不納制使

安衆秉威此真將軍洗洗

文粹作  
洗洗

桓桓克

壯有聞

英華此卷累用洗洗而文粹皆作洗洗疑當時避

熙陵藩邸嫌名

許譙公紹

羣動相食血流中原譙公夷陵豺虎與

文粹  
作為

鄰列境連



城火炎煙昏皎其一邦如王不焚三光忽開萬象皆新

誰有天下平生故人

公與高祖有舊

引忠歸城豹變蠖伸金石

之契移為君臣弈弈煌煌為龍為光元戎啟行大沛央

央式遏大江奄征南方恩斯勤斯兩不相

集作可


忘

陵母頌

皮日休

孔父稱唯小人與女子為難養也夫女子之忠貞義烈或聞于一時小人之姦詐暴亂不忘於一息使千百女子如小人姦詐暴亂者有矣使千百小人如女子忠烈

貞義者未之有也則安國侯之母也不以項強而劉弱  
俾子事項不以子背君而別事而有忿色對暴君而抗  
大節捨其生而踐死地嗚呼春秋書解楊致晉君之命  
漢史稱周苛拒項籍之爵方諸陵母誠未為忠何者男  
子少服教壯行道忠貞義烈雖死不辱鼎鑊在前而不  
懼鎖集作錯笮被體而無怨乃男子之常事也至夫女子  
少隱惟薄壯執箕帚豈常熟於忠貞義烈哉是女子之  
有是者猶百物之有瑞者矣豈易為哉豈易為哉



文苑英華卷七百七十六

欽定四庫全書

集部

文苑英華卷七百七十九至

詳校官監察御史<sub>臣</sub>范衷

助教<sub>臣</sub>常循覆勘

總校官進士<sub>臣</sub>朱鈺

校對官助教<sub>臣</sub>黃昌禔

謄錄監生<sub>臣</sub>胡觀瀾

欽定四庫全書

文苑英華卷七百七十七 宋 李昉等 編

宮闕上

九成宮頌一首

宮闕上

九成宮頌一首

并序

王勃

臣聞在天垂曜璿宮列乾象之墟在地班形珠闕鎮坤靈  
之野洎夫三精軒運即寥廓而為宮九聖旋游遍洪荒而

可宅則有瑤房王室崑山分大帝之庭金屋銀臺滄海濯  
玄元之宇豈非神明其道騁仙轡於無垠浩蕩其居示清  
都於不宰若夫扁牖六合奔走八神占日月而揆山川駕  
陰陽而法天地非聖人其孰能與於此乎至若文開遁甲  
仇峯成蒼后之躔樂奏鈞天峒嶺駐黃軒之駕業融環堵  
下姑射而尋真道濟巖廊望衡山而展事斯則三階遍下  
唯臨布政之宮六位時乘未闕巡方之館其後兩龍齋鷺  
抗瓊闥而同嬉八駿高驤指瑤池而結興殷風不競砂丘雄

別館之娛秦道無章雲閣徇殊庭之賞於是功虧大壯頌

闕祈招豐屋同忌危輶繼及遂使來年

此句疑

侯跡名山為

縱觀之場並海遵河沃野盡行宮之地皇天震怒於上蒼

黎叻慟哭于下土其有斟酌千古文明一代萬官不陋茨

山可仰靳成東岳唐帝復衢室之尊用饗西岐天子合鈞

臺之運得其道也

一作者

盖有存焉國家梯

一作張

霄架極罄

域裁基纂高丘白雲之嶂鬱函都紫氣之兆宸扉既闢一  
宇宙而來王聖籙潛躋貳乾坤而作帝高祖天旗夜立制

黃鳥而先驅太宗日馭晨飛驟綠蟠而首出雖立極承祧  
之業進燭前文而重光累洽之符歸功下武陛下承靈太

一踵睿登三星虹沓社電

一作雷

虬發慶丹書碧篆神符

煥河洛之文王斗珠衡天骨拱皇王之表用能捨桐珪  
而瑄七鬯肅玉籍而揖宗祧寫藹九天騰景萬里御風  
雷七曜於上博臨之功顯用山川六府而下輔相之宜  
得玄宮密運敷造化於靈襟黃屋神凝創經綸於寶思  
鳳闈宵靜陰靈宣玉闈之華鶴禁朝趨離象峻銅樓之



景川分帝子控鯤壑而疏源岳動天孫擁熊山而列鎮  
其化成也如彼其強幹也如此猶乃停旒正室巖壙中  
軒玉階匪泰金門為險佇虹旃於月澗岳瀆生光飛鶴  
輦於煙臯江湖動色桃溪逸彥塞丹井而歸風松磴遺  
英斬玄闕而奉制位蕙河海九卿叅巨濟之功道合星  
辰三事鬱經天之象朱轡緝化泣故老於中溪墨綬宣  
風繞春童於上陌王化之基一作期已洽天工之代有序  
建銅儀而測曜象一作寶緯齊懸按璿璣而書雲禎氛一作

疊舉祥噀十二紫鴻調夏谷之音大禮三千頽蛇應  
黃鐘之曲蚕功順令業著於青裳蜃磨迎春恩周於黛  
耜黃砂靜讞爽鳩興頌足之悲丹石銷寃神獬轍推鋒  
之計詠時和於帝壤動植咸驩歌道泰於華封昆虫自  
樂星墟列將輝玉節而長驅天策神兵下金壇而決勝  
橫麾赤坂葱山成不戰之郊命作會綴青丘桃野見其亡  
之兆煙馳火徼勵珠產而移琛雪驚冰洲駕瑤谿而納  
賚乾坤徑復載遵亦縣之封曦望環周未出黃圖之域

故夫含吐萬物至功也制平八表大業也一陰一陽神  
通也乃文乃武聖圖也用能使天不愛寶地不藏珍日  
月五行風雲四序龍章鳳彩鳥奕於郊墟黃鉉紫玉磊  
砢於垺圃集風雲於翠筵浴甘露於朱英澤馬飛鏡山  
輿結轍殊徽狎至祥書竭東郭之毫累譯同歸朝冊盡  
南山之竹然後瑤壇備物陳帝服而展皇儀后室疇庸  
登太山而小天下功弘事畢狹廣宙而三遷風舉雲搖  
歷神都而一懋考遺基於汶上稽故典於淹中光總章

之瑞紀嗣乾封之寶歷大矣哉昇中作睿握四海而為  
尊則大斯樸肇三宮而配永憑大室而高視靈壇八百  
坐明堂而恭已諸侯一萬時既貞矣襄城一作非辭訪道

之遊功既成矣玄圃頓尋仙之駕由是南宮奏議和玄  
禁而成章西土謳歌指皇輿而佇眷咸以珍臺靚穆陽  
靈開避暑之宮清序鈞調景福制追涼之殿然則高棟  
深宇威神之節也順氣發生巡遊之大功也况乎石

城金室

一作屋

編輿井鬼

一作論輿思

之區珠藪瑤池宛在秦

幽之境應雷駟而出豫蒼帝其時面炎馭而思和朱明不  
遠雖塗吟野忤黎元忻望辛之符而屈已從人天子下勞  
謙之詔候離局而從宴尚惕三危清近縣而移鑾猶詳再  
駕以為三十六所帝劉非舜禹之心四十二宮全趙異成  
康之歷詠荆臺而夕厲思蒲坂而晨凝方奉後天之期俯  
順觀風之請萬靈禋社三辰合慶姬文考筮容成奏日千  
旌鳳轉儼鏤象而星陳萬騎龍嘶伐靈鼉而曉應靜惟宮  
於綠野肅帳殿於黃街奔橈槍而走陸梁陳浮靈而候明

月前驅雷竦下列缺於騰鞭後乘雷驚起豐隆於驟轂瓊

戈畫按太陽疲轉日之鋒玉劍宵翻懸象睹衝一作星之

氣天旋霧散岳運川迴林兵護野方臣疑作方神班固東都賦山靈護野屬

御方神蒸頌第十七再用啟路黃麾紫蓋襟精氣而西浮雲動神行背

封巒而右指吐霧馳風以臻夫九成宮禮也爾時峯橫地

乳景戴天糜分閭井而圖基蔭秦星而耀趾靈墟寶藏代

興汧雍之間峻阜長岑疊鎮岐梁之域丹溪碧洞吐納虹

霓偃一作栢叢篁騰遷雨霧獲秦餘於故兆地擬林光訪

周舊於遺風山連水滸前趨劔棧玉壘千尋傍望斗城金  
墉萬仞架陰丘而北走境瞰廊祠分沓郭而西馳塗交隴  
坂仙都密爾猶連上苑之扃靈宮巋然直透崇岡之曲即  
礪基於礪道利在斯干固拱木於虞衡規同匪日彌峯跨  
谷層城萬轉歷險乘危迴廊四注山祇畫石出微道而終  
年風伯羸糧半長途而中宿架千樓而致極疑作極極揚雄甘泉  
賦檄北極之嶙嶙爛若神扶羅萬戶而窺天巍如化立離堂早  
照曦日籠光於綺寮合殿宵深歸雲納影於重廡珉房

砥室畫拱相望綠岫紅巖雕櫳間出玄熊蚪蛺俯棟宇

一作相而危心青鳥歸飛仰靈軒而墜翼轉飛檐於秀萼

上出重冥蔭反宇於迴谿下臨無地紅葩紫的垂倒井

而披文金鎖銀鋪接重扃而炫色儼鉤陳於漢陌太階

非遠設陞戟於煙庄仙梯可陟華璫壁散掛明月於崇

朝密網珠連落奔星於已曙丹楹一作梁發秀彩沓虹文

皓壁凝鮮光涵蜃氣銅龍對雷接飛泉而瀑流一作灑鐵

鳳連甍倭還颺而佇立雖南纏統序北室開榮一作北屋開辰



凜勁氣於叢楹起淒風於洞穴一作跋烏失轡出澗戶

而無光金兔低輪下山扉而變色陰庭阻夏祝融無竊

據之因邃屋乘一作春顓頊定忘歸之策飛廉扣響赴

北闕而神寒屏翳收津跼南端而股戰蒼蒼八桂白露

為霜落落干松玄陰昧景金人列陞來危砌而思裘玉

女窺窓伏增巒而請纘陽秋代駕不凋仙圃之華天一作

增地為鑪未解幽陵之凍至若氣清乾步景霖山維栖

翠藹於崇榮列朱霞於複榭瓊枝累道移緞文椀碧樹

周阿光搖鏤檻靜簾帷而洞啟穆羽相和肅坻堦而天  
臨纖塵不動宸儀有晬蓬萊與城闕俱榮羣后多歡蘿  
薜共簪裾合賞巖花落砌綴龍床而成文嶂葉交軒拂  
鸞旗而追影鑪峯轉謁香傳玉几之風石瀨鳴湍響入  
銅壺之水乃有稜一作陵陽駕鶴奉丹墀而稱臣子晉吟  
鸞下青蒲而謁帝箕精失耀傅說恭命於東廂昴宿低  
芒庭堅奉職於西序三臺九署雲端極目霓裳風髻闕  
下相尋張良卧疾攀赤松而有地綺季來朝歌紫芝而

忘返若夫功成旰食道濟宵衣漢宮追聽覽之餘堯殿  
得巡來之隙霞登月憇光睿幸於彤闈玉振金聲藻宸  
章於翠掖洛陽才子承閒盡宣室之談蜀郡詞人還奏  
動甘泉之賦復有軒庭十四出桂閭而乘茵永巷三千  
望椒塗而奉幣翊鸞臺之廣宴扈駕砌之仙遊羅綺芳  
兮四面春環珮鳴兮九重暮風閨夕敞携少女於歌筵  
月幌宵朧下姮娥於舞席玄房娛宴雲姬辭豹尾之歡  
紺幄承顏星媛入魚鱗之戲若乃屯營櫛比對閭道而

斜趨解寺碁分混文昌而外屬周朝瑞鸞聲叅叶律之  
宮陳寶鳴鷄響襟司晨之序名都廣會閭閻萬室帝籞  
仙垣亭臯千里山村野塾家連菌草之園谷飲川居戶  
有桃符之水故夫恩加草樹園原澤而無私道被翔行  
苑山川而不禁每至旻天戒序高風嘯律虞官獻秋獮  
之儀司馬奉梁駟之典將軍布卒畧玄灞而東馳都尉  
關營統擬作統張衡西京賦  
統黃山而款牛首黃山而北睇於是逢蒙列  
階蚩尤並轂材官發射期門走伎杖玄麾而直指鸚視

千羣奮朱鬣而橫行龍驤萬計曾旗廣旆出宇宙而三

驅疊鼓鳴鐘連

一作連

雷霆而一呼前旌逐日夸父斷洪

河之流後騎趨山共伯挾崑崙之柱近陵吐焰縹奔電

於長鋒灌莽生塵墮飛霜於勁鏃合戈鋌而照地猛兇

知窮振罟網而籠天騰龍夫據崩林礫石毛羣無挺險

之資蔭澤風山羽族落垂雲之影長圍躡蹠得駿馬於

秦垞大輅倘

一作翔

祥載飛熊於渭浦然後還師振旅考

事陳功皮軒按節牙璋復路視餘生於大野誓廣校於

長阪腥膻

一作班腥

於截辟之墟有蜡於長楊之館命奔烽

而舉醕火照甘泉總輕騎而行庖雲驚上路聲兼萬籥

歌鍾空廣樂之庭禮被三雍玉帛盡塗山之會龍胎鳳

卵入禹膳而調芳石乳瓊漿委堯樽而湛色思霑

一作露

下帛宴液仙宮雖大夫思濯鷄之歡而天子可迴鸞之

奏然後拜墮清廟考德齋宮用玄功而不有宅太虛而

無迹動崇易簡規萬祀而化黃金道貫幽明徵百靈而

響丹甃得玄珠於舜海尚驚冰危朗天鏡於堯儀猶勤

日晏虔恭上帝東朝懸待諫之旌清問下人南面聽登  
聞之鼓則有郊童俟蹕敢讓天師野老排闥唯歌帝力  
風行比屋忠臣收折檻之謀化溘康衢良使息埋輪之  
請設神規而動俗庶績其凝握元符而發祉殊方合應  
華胥已泰濟羣生於不死之庭閭閻可觀致仙厯於無  
窮之境蕩蕩乎發育萬物而顯諸仁洋洋乎包舉六氣  
而藏諸用均兩儀而得一耻三皇而不四者矣臣勃東  
臯賤節比阜幽姿常叨召見之恩驟玷明敎之列書生

謁相望闕推輪下客遊梁榮叅賜帛終童立志空投函  
谷之繻馬令同時未給尚書之筆雖玄機妙鍵已寂兆  
於忘言而詠德陳功請追聲於匪頌其詞曰

九門浩蕩三山超忽帝坐金房仙成玉闕浮丹麗紫栖  
霞冠月真匠難徵虛談易越其一旋窺鳳紀極睇龍墳曾

巢化沒上棟文

一作文

分茅宮蔽雨松殿來雲猶迷匪陋

尚缺斯文

其二

道倫明一風遷繼五禮讚三宮詩歌百堵

黃圖未洽紫庭無輔局促墉垣逡巡度矩

其三

盛衰環襲



冲盈舛驚璿宇夏關瑤局殷樹奢窮地絡毒流天步相

曰

一作日

遄奔尋雲速仆

其四

災延六國運逼三川分雄競

侈禮僭圖全飛霓月徑列廡霞阡乾谿敗楚碣石亡燕

其五

阿房秦構文軒五里建章漢立仙闈萬扈

疑作祀

詭代

齊徑

一作湮疑

違天縱已望夷有豐甘泉不祀

其六

宛郊嗣錄

譙鄉警衆蜀跨梁岷吳吞楚夢相宜裁軌崇楹累棟雲

闕同華泉臺罕共

其七

晉圖給

疑作終

否朝

疑作胡

風肆極霧

黷丹園塵埋紫域皇階不守帝庭無色帳殿相臨氈墻

間飾

其八

南承有宋北洎亡隋功慙戶牖守在城池樓船

水覘車陣山窺吳庭再毀代昂三移

其九

火德初融江陽

裘

疑

旅奄收淮船遂朝吳渚象措

疑

驕秦龍舟壞楚雄

圖乃溢傾宮不處

其十

海岳呈華風雷寫慶剪諸戎首光

我靈命紫氣雲蒸黃星月映輔商為業遵唐啟聖

其十一

景闕丹繩祥抽翠籙格天垂範模神鶩躅朱極重光黃

離繼旭道清金鏡時和玉燭

其十二

激規鳳闈毓訓鸞闈

桐宮宿列桂邨霞飛台精變道岳耀裁幾朝盈振鷺境

北馴翬

其十

武韜弓矢文經步驟爽鳩議獄龍師掌奏

玉帛華夷提封宇宙譯書歲款祥圖月湊

其十

帝功得

一乾元用九鏤玉天齊塗金社首神京四邑明堂八牖

燮而可大為而不有

其十

曾宮望幸幸封佇悅伺隙披

圖乘時徒

疑

轍赤駢侯駕蒼虬按節月車宵移星闈曉

列

其十

方神護野岳將清塗迴麾嶠路逗蹕山樞干靈

電驚萬辟風趨鈞臺有問峒岫無虞

其十

五城分秀雙

巒抗影盡拱彌峯雕甍亘嶺煙閨夜謐雲房晝靜竹殿

栖寒松軒祕景

其十

紫庭晨御彤闈早闢天子凝旒辟

公奉壁薜蘿齊致簪裾混迹仙鶴隨輪靈鳧墜鳥

其十九

風扃瀟灑震廊藻邃玉網星開金鋪月墜山樓獸橋雲

臺鳥次複郭披丹迴流轉翠

其二十

仇夷聖宅姑射神心

樂翔丹鳳使引青禽羲壇葉暗禹洞花深沼分瑤水花

跨珠林

其二十一

順時宣節分戎講將星騎朝飛雲露夕張

寶鷄獲祉非熊入貳駕掩岐蒐禮高奏

疑作

望其二十二 鄴

庭未遠塗山有戮襄野迷軒清都宥穆罕夷乾步徒豐

帝屋光總大猶允歸天祿

其二  
十三

命宮垂訓靈臺韻雅功

映寰中頌流天下皇圖已泰鴻筆難假帝有力焉惡

疑

非能者

其二  
十四

文苑英華卷七百七十七

欽定四庫全書

文苑英華卷七百七十八 宋 李昉等 編

宮闕下 城邑附

乾元殿頌一首 新廣雙城門頌一首

蘄州新城門頌一首

雜頌上

馬寶頌一首 神雀頌一首

宮闕下

乾元殿頌

并序

王勃

臣聞鵬霄上廓瓊都開紫帝之庭鰲紀下清珍野闢黃  
靈之館無山配極照鸞闕於霞標薦水涵元湛驪宮於  
霧壑斯則神徵語恠功潛鳥跡之初理涉非經道昧鶉  
居之始授鳳書而稽碧落仙構罕存按龜錄而質黃圖  
金模間起粵若風移處閣增巢恢火運之機業拒嚮明  
上棟括河圖之奧三堦布政詠匪日於靈臺百堵陳詩  
頌斯干於考室亦有黃軒瞰月樵門頽九洛之功璿闥



排煙牧野構三河之酷御燕臺而臨北極缺王度於祈

招列雲閣而拒南山隕黃謨

一作謀

於軹道然則卑宮畏

禮采椽輕四海之尊豐屋延災栢梁非萬乘之有雖因

時立事奢儉殊流而弘道在人興亡迭

一作逆

運靈光末

造不窺九室之榮景福宏規猶擁三方之疊聞

一作瞻風

舊史逮曹馬而無譏觀跡故墟歷周隋而未得自我唐

太陵遷構均五方於鶴几之前中野凝圖調六氣於虬

牀之下坐圭臺而清俯仰啓緯齊明臨鼎邑而重威靈

雲雷合響得玄功於大壯其至在茲乎我大唐鷄渾制  
極樹神宰而制山河鶴譏裁儀闕太虛而有天地黃精  
吐瑞潜龍苞象帝之基紫氣禎一作頽祥鳴鳳呈真王之

表高祖太武皇帝虹星湛色開寶胄於金壺蛟電凝陰  
發皇明於石紐白蛇宵斷行移海岳之符蒼兕晨驅坐

邁雲雷之業屬東隣委馭扇虐政於叢祠北拱鼎尊紊

皇圖於寶極蜚鴻集野瞻烏鮮投足之因青牘

疑作積  
青精光

武時  
賊也嘯風羣鹿無擇音之所天街五裂截鯨浦而飛芒

地紐三分觸螯山而按節玄虬在御掃圻甸而廓星都  
黃鳥分麾動扶搖而駭雲陣鑣官杖鉞跨高陌而登元  
轡野韜戈陟圯壇而擁號皇圖不恃聖人追卷領之風

神器無私

一作移

才子奉褰裳之運太宗皇帝雲房揖契

壓麟璽於庭軒雷渚翔英擾龍鈴於高席

一作周鑄

八能一作

龍亨運抗鴻邸而杖朱髦十亂恢基臨鶴州而擁黃鉞

唐雲秘族潛開白水之徵代景迴輪光踐丹丘之運權  
輿象緯削茅社而建瓊桃草昧風雲席羅圖而創璿厯

紫庭合粹括宇宙於宸襟丹宸凝尊運陶鈞於寶思摛  
碧霄而鍊石上清耀魄之宮詔寰海而捐珠俯睨陽侯  
之室功驅偃伯頓鷲視於華封道被來王靜龍吟於武  
庫玄樞上運卜年開累聖之符丹竈昇遐遺範啟謀孫  
之畫皇帝陛下椒庭襲慶曜璿萼於霞庄蘭殿分休湛  
珠衡於月館道凝瓊鎮下蒼掖而照重熙業峻銅樓憑  
紫軒而揖羣后環四瀛於舜抱漏蟻覃津栖十景於堯  
衿巢螟荷照上元開籙寶龜定皇邑之模下武崇基飛

龍錫帝臺之構貞明啟運齊一作齊玉鏡於鸞門易簡成

功偃銅符於鶴仗一作帳懷降尊於襄野大階忘七起之

勞念負重於焦原巾席託三危之險臨翠媯而則道天

孕時成坐玄扈而被圖神超物妙闕星濤縱淑曳珠

紱於銅臯雲野疏祥抗瓊枝於桂浦素蟾登慶六虛充

牝馬之貞丹雀御林三雅合闕睢之好璿宮夜靜居龍

幘而調元金房晨開御駕階而緝化芝庭楫訓遠清和

鳳之儀蘭珮承風競峻當熊之節皇太子承雲紫座翊

八柱於乾維湛粹青衢揖三樞於地戶黃離踵曜太陽  
分銑樹之輝蒼震薦音少海控銀河之色鶴筌飛奏想  
丹駕於瓊山鮑俎捐芳齒玄冠於寶序彤闈問豎禮崇  
監撫之威黼席興賢義極君親之愛若乃東門卹瘠疊  
仙構於熊山西苑承家導靈波於鴈沼桐珪作瑞鳳毛  
曜丹穴之英芽壤分維麟距冠玄丘之俊異宮延粹闕  
朱柱於娥臺允野流芬疏紫蘭於別館頰隈毓範雲門  
分戚里之驩一作嶼凝規星閣絕郎官之請雕龍命

職縱跳澤而驟鱗翠鷄調司順義颺而撫翼月軒宵佇  
虞谿降璿緯之精震帳晨披姜水洞金韜之賸飛鶴書  
而抽海狀桂壑於是投綸轉麟旆而揖山容松澗由其  
削衽軒圖瑞喬泛花綬於鷄林農紀祥炎濯蘭纓於鳳  
水仙臺倣務三珪銓棘序之風天秩調邦六府變槐衢  
之典金門獻納縱麟筆於苔牋石館論思覈龜章於竹  
槩淹中訪禮蹲龍揚壁水之波稷下談經飛兔躍環林  
之秀詞庭吐鳳翫鳥跡於春豐書帳翻螢閱蟲文於夏

閣杏花千畝紺棘照帝藉

一作唐屋

之功桑柘三宮玄紱降

親蚕之禮圓丘上闕奉蒼壁於靈壇方澤下凝列黃琮  
於寶琿朱絃翠璣履霜懷四響之尊複雷重檐涓日正  
三綱之首五靈奔慶冠蛇澤於黃樞六祀銜欣颺麟煙  
於紺席遺弓積慕虔深太廟之儀執豆推恩道振明堂  
之禮瑶山廣樂備逸調於宮懸洞庭仙奏納遺歌於帝  
府九韶分唱后夔清桂序之音六變同和飛鳳掌梧軒  
之律樽俎折旋之數苞舉陰陽堂庭節奏之規彌綸宇



宙靈襟索隱控風伯於詞林睿想鈞深詔天吳於筆海  
神窮獨照傍探赤水之珍思洽幾深迥寫丹谿之韻金  
壇紫露映銀籀而翻華瑤林白雪藻瓊章而吐絢蟬機  
撮化銅渾將九聖齊懸虬箭司更銀漏與三辰合運爽  
鳩分職素雲頽鳥啄之祥神獬鬣司玄水照龍顏之則  
黃沙鞠草剗叢棘而遷訛丹石滋苔仰甘棠而息訟融  
臯再稔方聞外戶之謠昧谷千箱坐溢康衢之奏百城  
煙峙望秋露而乘風千室雲開合霄建而組化彤幃獨

選熊轡下蘆鴈之祥墨綬分賢犀檢降槐鸞之祉筠駮  
佇信髦士剖竹而相尋葦杖霑仁鮎叟攀輪而不暇龍  
蛇可踐野人豐荷杖之驪雞犬相聞城尉輟鳴桴之響

五雲抽潤湛芳氣於璿臺六府威殷唱豐歌於銅闕不

一作嚴

戒而昇東戶恩周動植之津博施而舉南風化偃

胎萌之寓神謀備預儼七萃於丹樞邃畧防微肅干廬  
於紫衛元戎握節黃公授犀闕之圖帝座聞輦玄女薦  
龍庭之策頴柯枿疑及中權決勝於兩階白羽俄麾善

陣推亡於四表朱匡反景之域削地弭於文櫬黑山明  
月之鄉委龍琛於武帳錦軒星鶩控乾絡而觀風繡服  
霞驚泱神絃而問俗川浮沒羽鯨谿靜丹浦之虞陸薦  
飛毛熊蹯動青雲之偵銀關驟雨望紫陌而趨恩鐵幌  
馳風計彤闈而瀝思赤馬文援之寶叢積乎郊虞紈牛  
露犬之貢滿盈乎儲邸青丘畫野不踰征賦之鄉蒼水  
奉圖未盡隄封之貫且夫緯武經文宏業也含幽育明  
至誠也混齊六合大功也規模百代昌數也故能襲九

空而寧庶物劃千里而統諸侯休徵象德而動嘉符觸  
類而至風揚畧洽藻乾慶於芳年司節河謙疑藹坤禎

於明渚瑤枝結慶泉埃蕩玉蓋之文瓊液浮甘天酒綴  
金莖之色黃甍紫脫湊仙韻於中畿翠蕙丹萸疊靈株  
於上序駢眸候日漾影蒙池比翰翻風栖光理木祥飛  
井絡震鱗題瑞朔之元祉絢新郊枵獸紀和年之序具  
靈篇之絕貺究仙謀之殊休天人之際交矣皇帝之道  
備矣由是三靈物覩扣蘭禁而棲誠九服子來詠蒿宮

而騁力去奢去甚不矜黃屋之隆匪樸匪雕方順丹墀  
之請宸規相宅考周舊於靈都睿覽思和獲秦餘於正  
殿羣臣列陛奏蕭相之遺模天子臨軒採荀卿之故事

炎洲八桂筵仙拱於林衡層

一作

畎五松委靈材於梓

匠衢宮記範萬機抗九戶之尊海孽移琛干樂省十家  
之費飛廉卷藹徹煙極而浮甍屏翳收津劃星墟而置  
紮瑤階百雉光懸寶露之壇瓊壁萬尋影綵崇霞之閣  
拖虹梁而四注星漢虧於上榮疊雲棟而三休寒暑隔

於中雷雕楣鶴企香勢分規繡栢虬奔殊形別起圓璫  
布藻瑩羽壁於狼泉方鏡披蓮孕化璣於蜃浦芝樓對  
幄重傳五日之風芸閣列錢彩鍛三旬之霧文疏草迥  
陰兔息肩於綺寮翠幌籠霄陽烏綴翼於珠網豐隆按  
節下複撩而司階列缺施鞭低叢楹而假道溫房佇幸  
煦芳景於佳辰涼室乘閒凜徂飈於火序金鋪夕照若  
帝圃之輝瓊英寶綴晨懸類阿房之聚銀燭煙丘碧桂  
翊珉陛而披香雨岫頽筠夾璿流而颺影九衢翻翠雜

仙卉於中達四照霏紅間靈葩於右城神禽率舞光浮  
肆夏之軒瑞鳥相鳴響叶鈞天之樂鈎陳宿列儼雙碣  
於丹青綺繖霞周闕干門於紫露爾其左扁嵩鎮申侯  
降太室之禎前枕莘郊伊尹發空桑之秀揭熊山而北  
眺貝闕猶存覩龜溜而西分瓊臺易接總交中宇廓川  
陸而疏畿竟想善鄰揆風霜而建野然則因秦構極祖  
宗耀金策之符作洛恢基我后創璿居之始援天引聖  
隔代重暉橫紫都而可襲配玄宮而非遠故能使神光

夜燭鏡麟趾於文除仙滄晨華委鸞章於繡礎靈爻密  
發八方昭大有之和寶篆潛開六合啟同人之會兩儀  
交慶虛碧墀而翹旌萬寓披歡指蒼車而候蹕雖青蒲  
頌德東朝獻龍鳳之圖而丹極鳴謙南面動豨羊之詔  
百神推策望璆徑而虔誠三讓奉符顧瑤壇而肅事龜  
書吐瑞按五校而分營鳳策揚輝翔八鸞而節步帷宮  
霧轉列芝蓋於中天帳殿星離軻蒲輪於大野紫鱗充  
饋若大帝之共臨素鶴翻華類羣仙之廣宴花開瑞雪



委瓊饌而調芳綵絢祥雲夾珠旗而曳影功推三祖銀  
繩勒東岱之威業峻一人金筴奉南山之壽道既成矣  
玄符集矣代既貞矣元勲緝矣運三辰而虛玉柄風允  
渙其中孚懸五禮而偃金科雷坎光其作解奔烽舉爵  
溢仙酒於中衢疊鼓分餽泱宸輝於下里吞九重而上  
運控八聖而遐征翔赤驥而睇風區吟翠虬而掩霄甸  
隱隱轟轟雷動天驚回輿斜眄而降乎乾元之殿司宮  
庀職肅坻墉而神行掌舍巡方煥巖廊而洞啟赫若朱

螭負漢而輝橫海之鱗默若蒼鵬架壑而振垂天之翮

千官曉次僚銀榜而端簪萬戶宵披候瓊膏而肅帶靈

戈列陞天官具三揖之儀雲輅充庭宗伯橫一作寅九賓

之禮瑤鯨戒響懸猛籟於端闈銅一作銖狄分形肅嚴扃

於左序排紫微而立極宸儀冠明后之三俯黃道而披

軒仙歷用乾元之九蕩蕩乎何聖人之無外魏魏乎而

神功之不窮也臣勃席芳十步企景三冬雖承宣室之

談猶窘靈臺之影仙壇遠秘已多謝於祥鷄大厦初成

復攀榮於賀雀慨深梁甫終垂捧日之歡思極甘泉未  
動凌雲之價神圖不測固流絢於丹旆微志可存庶鐫  
芳於翠琬敢獻頌曰

紫扃垂耀黃樞鎮野銀樹霜披珠臺月寫嚮明立極橫

神廟

一作  
廊

社大壯摛爻斯干韻雅

其一

鶉居化沒徂訛道

長瓊構霞明璜軒露敞棄人崇欲違天靈象南巢不救

東鄰長往

其二

瑤緘考懿金板藏功道凝茅屋業盛蒿宮

龍階察稷鵠閣調風推訪華禮酌儉思冲

其三

懸釐結疊

傅翼生災千甍嶺接萬拱星開爭圖絢侈福極凶米風

寒碣館露慘蘇臺

其四

十館營秦金房砥室千間架漢韜

雲闕日濟惡承危同亡異術傾軛未遠遺墟繼出

其五

龍

川結禍鶴塞稱符塵驚八際霧慘三都穹廬寶極蜀幕

璿樞司宮墜典掌舍淪圖

其六

蒼衢毓祉丹丘表聖鳳矯

仙樞龍迴寶命道凝金冊功馳玉鏡紫氣抽華黃輝疊

映

其七

神稽鶴識迹播鷄渾重光累極翼子謀孫經天緯

象就日提元鸞軒湛粹鳳几裁尊

其八

祥抽紫歷業照彤

管珍雀朝翻仙蟾夜滿丹墟獻跡青臺墜卯椒閭儀風

芝閨奉款

其九

登三建緒明兩開儀龍譙霧鬱鷓禁霞披

浪分璿渚景峻瑤枝黃扉晚列丹轂宵移

其十

龜文獵彥

麟旌放逸桂客攀榮松賓改律紫鷓開紀丹虬聳秩縱

壑搏颺登山捧日

其十一

功融棘序道備槐庭不仁者遠

惟道斯行煙搖墨綬電轉朱駟境懷春翟野散秋螟

其十

二 鄭竹分科燕棠輟諷銅機化極珠囊業洞禮貴丹虬

樂調朱鳳珠垆獻寶綿鄉委貢

其十三

龍闕靜柝鶴塞投

弦歌呈豹尾舞進鳶肩銅抗疑月斤鐵輞星懸繩幽架

險驛霧馳煙

其十

霧壇凝紫河宮湛碧翠蕙翻殿丹堊

候魄霜均電散連珠契璧蔦蓋籠霏花衢墜液

其十

年

和政美化極風調靈臺軫詠考室興謠循圖訪典去泰

捐雕道存南面讓屈東朝

其十

望雲裁構籠霄建宇方

鏡星離圓璫月聚梓匠傾思林衡授矩畫拱栖煙文軒

架雨

其十

芝房疊翠桂廡流丹霞張萬戶霧葺千樂重

扃駐煥洞牖栖寒神加有叙賦入無端

其十

帝圖臨御

皇僚萃止電戟揮霜雲旌拒啓紫宮可逼黃街易履鳳

礎騰文麟庭抗禮

其十  
九

珠泥暢績銀繩鬱契鶴嶺雲明

龍壇景惠道超中古功推下濟惟帝惟天惟帝

其  
二

十

新廣雙城門頌

并序

符載

貞元十四年我常侍鍾陵之政成繇賦均調法令脩理  
男女小大祇承教化土地千里啗啗浩浩莫不剗心化  
為端良然後覃思閒暇將有改築自我官府至于門臺

是用乘時洗故作新先是城有贅墉橫亘東西盤護便  
地甚曰無壯瞻彼闐闐亦特其門崇未及雉廣不容軌  
公斲掘平夷垣脩塗壞撤規模巖巖四扉每五夜將旦  
候吏雲委鼓鳴逢逢鞀然洞開軒蓋絕塵一作麗非而並驚  
軍旅擁闕而全入旗過優游馬不駢蹄一作旗過不偃游馬立不駢蹄  
徘徊流覽勝氣洋溢改作之致騰凌前人真卓然之思  
也君子謂公氣冥玄極智遊象鬱以盛德統于大位苟  
視民之弊吾見其雍闕不和之氣決防潰澤之不若也



豈復有煩寃淫濫之志漸于風俗哉循跡觀改疑正在  
於是公嘗自濡翰有所紀叙實恐揮謙休聲不揚小子  
愚陋贊述銘頌請刻于貞石之陰使新門之績也皇皇  
然頌曰

鍾陵古城隘不工麗譙隙穴廢崇牖右貂作鎮寢一作掃

前蹤中央砥平谿蒙籠嚴城朝旦日瞳瞳高開四門車  
馬通此邦此績垂無窮敢紹華藻揚清風

蘄州新城門頌

并序

城于防春秋書之重時也城于蘄與人誦之美功也何  
可謂之功曰余得言之矣大唐庚辰歲秋九月岳鄂觀  
察使御史中丞鄭公前牧于蘄春始佩銅虎符是年冬  
十一月蔡人不虔天子詔諸侯之師誅破之我有疆場  
與人腹背慮禍甚劇為虞落然民大愁恐若寇暴至是  
邦一作也夙昔無事人傲慢垂百餘祀城隍不張頽墉  
壞堞僅為平野公乃度舊址量容土備畚鍤嘯丁壯勃  
焉而興於是謹刀布以索力考鑿鼓以蕩氣嚴進退以

設令立師伍以程課烝徒雷呼萬鉞星飛誅惰聳勞間  
無留時凡甲子五癸即岬然城成矣墉高三雉門容兩  
轍周迴一千八百四十步門臺睥睨霞絕雲截如崇山  
斷岸邈不可嚮議金湯者我居首焉日者嗣曹王臯討  
希烈之叛于此嘗具板榦作為坯築役徒巨億經費稱  
是樹而復潰卒無能名風俗耆老以為蛟螭靈恠蟠窟  
固護使人不見其績也公躬自省視循理辨物心禱且  
計輔之至誠遂用堅緻於戲蘄城楚舊封也疆淮蔡邇

申息地當隘束實生攻奪若嚮時敵者驅鐵衣出穆陵  
襲我無備搖脛而至即江淮之南吾見其波動矣然俾

夫大藩倚

一作椅

其固屬郡把其勢千里士庶高枕而卧

寇不致

疑作敢

萌彎弓捨矢之意者新城之謂也繇是大

君聽民間威聲聞望以公有文武上才秉心塞淵可以  
防方隅可以握貴權故拔自倅牧雄居盛府山川幢蓋  
皆舊物也寄任之重負無其隣夫賢為世出績因時達  
微新城吾見公之力才事業其堙鬱不揚乎鯁生作頌

頌以示後辭曰庚辰之歲鶉首有彗人用五兵維彼蕞  
下墻及風馬寶啟戎情在昔無虞蔑其闐闐埤堞頽傾  
我公作守恢拓荒舊乃新其城百堵言言四阿孱顏矗  
如雲平扼衡據會寇不敢過生人休戚維茲盛烈遭時  
而發鴻振芳名我有貞石不追不琢孰聞風聲是用作  
頌冀茲不朽與日月永明

雜頌上

馬寶頌

并序

梁文簡帝

皇帝應百姓之心副四海之願復履玉衡還臨億兆天  
地交泰日月貞明至理惟新隆平方始遐邇壹體中外  
禔福含生欣欣若耘耰之逢夏雨懷情坎坎譬草木之  
值春風帝王之道超邁開闢睿聖之功殫歷邃古軒羲  
不足鑿杓堯舜不足憲章至哉大哉無得而稱也五月  
丁酉朔絲竹會於德陽之堂一作殿於時日進內宮星次  
鶉首仲夏之晷稍極陽城之圭蕤賓之鍾初應潁川之  
律緡雲旦卷南風晚扇惠氣入帷清陰周宇玉輿雲罕

照日充庭羽林中權分階列校簪笏成行貂纓在席昭  
天之樂金石鏗鏘報地之禮威儀肅省詔以馬寶示羣  
臣太僕効官趣馬掌贊三令五申丞聯事舉八麗四圍  
給役相趨暉煜金鑣陸離寶勒天地無疆之德永星致  
遠之功鸞眄善鳴龍儀美稱沸毅權竒之威趨攄抑揚  
之態足轉驚雷眼流含燭霧噴紛霏流沫飄洒數千為  
壽豈待原蚕之禁萬里一息不藉杜衡之草王良不能  
控其衡策伯樂不能辨其文機方知總轡崑岑周非善

馭張樂大野夏有慙德豈止沉河用壁獨有綠文之稱  
盛德在木偏受蒼龍之名至於干將寶劍遙服書鄭之  
軍蓮花烏玉騰威大海之際况乎馬寶義實踰之方當  
夙沙自歸滑疑橋屈膝欵關入塞偃武脩文去病無出  
師之勞充國罷議邊之畧五律成珍九河如鏡臣謹按  
瑞應經彌勒成佛經中阿含經覽愚經並稱第三之馬  
者三十歲華子云堯漢皆得馬者堯漢皆火德正斗南  
方乘德而至也豈非聖德汪濊皇風洋溢研機洞元備



禮達義是以天不愛道白馬嘶風王澤効祥朱鬣降祉  
比夫圓蹄方足躑躅在郊風嘯電奔聲疑遨處圓五彩  
依樹三雀登巢安髻髻於當今弗擬議於休應百辟卿  
士咸稱萬歲伊臣不佞結慶雲霄親承詔旨預觀寶瑞  
手舞足蹈贊揚不足宴禮斯畢退而作頌其辭曰

帝廣運德欽明儀郊升道形聲德為軌仁作經璇璣正  
太階平割五禮和六英開四攝行八政轉輪皇飛行聖  
愍含識資惠命引蒼生歸法性菩提真般若淨七寶均

萬邦寧逖惇史觀陳詩域中大唯聖期聞

一作聞

玄妙復

孝慈解流澤隨因時刑已措績咸熙三農盛九穀滋萬  
祇悅八神怡律有節厯得天景星曜慶雲連珠為月醴  
為泉民何幸值皇年乾道應坤馬來度玉關升玉臺鏤  
錫煥鸞鑣迴槃雲轉堞塵開干天駟百龍媒永伏阜掃  
駒駮秣瑶粟委芳芻九夷欵四表清眊胥樂興頌興

神雀頌

并序

許善心

隋開皇十六年

臣聞觀象則天乾元合其德觀法審地域大表其尊雨

施雲行四時所以生殺川流岳立萬物於是裁成出震

乘離之君紀鳳司鳩

一作紀  
鳳司

之后玉錘玉斗而降金版

金滕以傳並陶冶性靈含煦動植眇玄珠於赤水寂明

鏡於靈臺

一作于  
虛堂

莫不景福氤氲嘉貺叢集馳聲南薰

越響雲韶粵我皇帝之君臨闡大方抗太極負鳳邛捩

龍圖不言行焉攝提建指不肅清焉喉鈴啓閉括地復

夏截夏

一作  
海是

剪商就望禮其尊登降

一作減  
或作咸

昌其會綿

區泱宇遐至邇安騰實飛聲直暢傍施無體之禮威儀

布政之宮無聲之樂綴兆總章之觀上庠養老躬問百年下士字民心為百姓月棲日浴熱坂寒門吹鱗沒羽

之荒赤虵青馬之喬稽顙請隸削衽承風豈止呼韓北

場遠頌

一作  
類勒

狼居之岫熄慎南境近表不耐之城故使

天不

一作  
弗

愛道地寧恡寶川岳展異幽顯

一作  
明

效靈狎

素游頽圉膏漱醴半景青赤孽歷虧盈足足懷仁般般  
擾義祥祐之來若此升降之化如彼而登封盛典雲亭  
佇白檢之儀致治成功紫燎靡玄珪之告雖奉常定禮

武騎草文天子抑而未行推而不有允恭克讓其在茲

一作

乎七十二君信茂如也故神禽顯賁玄應時

一作特

昭白爵主鐵象之奇赤雀銜丹書之貴班固神爵之頌

履武戴文曹植嘉雀之篇樓庭集牖未若于飛武帳來

賀文梳刷彩青蒲將翺赤剡玉几朝御取翫軒楯之間

金門旦開兼留翬翟之鑿終古曠世未或前聞福召冥

徵得之茲日歲次上章律諧大呂玄枵會節玄英統時

至尊未明求衣晨興于

一作於

含章之殿爰有瑞雀翺翔

而下載行載止當辰宁而徐前來集來儀乘軒墀而顧  
步夫瑞者符也聖主之休徵雀者爵也聖人之大寶謹

按考異記

一作郵

曰軒轅有黃爵赤頭立日傍占云土精

之應又禮稽命徵云祭祀合宜則黃雀集昔漢集泰時  
之殿魏立文昌之宮一見雍丘之祠三入東平一作平東之

府並旁觀迴矚事陋人微奚足稱之矣抑又聞之不列  
胎剖卵則鸞鳳馴鳴不漉浸焚原則螭龍盤蛇是知陛  
下止殺故飛走宅心皇慈好生而潛浮一作潛育德臣面

奉綸綉垂示休祥預承嘉宴不勝藻躍李虔僻處西土  
陸機少長東隅微臣慙於往賢逢時盛乎曩代輒竭庸  
瑣敢獻頌云

太素式肇大德資生玄功不器道要無名質文鼎革沿  
習因成祥圖瑞史赫赫明明天祿大定於鑠我君武義  
廼武文教惟文橫塞宇宙旁凝射汾軒物重造堯風再

薰煥發玉策昭彰帝道御地七神

或作飛天

飛天

或作星

五老

山祇吐秘河靈孕寶黑羽升壇青麟伏阜丹鳥流火白

雉從風棲阿德邵鳴岐祚隆未如仙雀近賀王宮五靈  
何有百福攸同孔圖獻赤荀文表白節節奇音行行瑞  
迹化王黼宸銜環陞戟上天之命明神所格綏應在旃  
伊臣頌焉永緝丹素方流管絃頌歌不足蹈舞而宣臣  
拜稽首億萬斯年

文苑英華卷七百七十八



欽定四庫全書

文苑英華卷七百七十九 宋 李昉等 編

雜頌

靈泉頌一首

唐平陽郡龍角山慶唐觀大聖祖玄元皇帝宮金

籙齋頌一首

開元正厯握乾符頌一首

復練塘頌一首 玉版玄記頌一首

巴州化城縣新移文宣王廟頌一首

畋獲虎頌一首

靈泉頌

并序

駱賓王

聞夫玄功幽贊靈心以有德是先

集作親

至道冥符篤行

以通神

集作仁

為本若乃天經地義色養叶於因心夏清

冬溫敬愛弘於庶

集作錫

類下及

集作速

六幽之奧上通

集作

洞三光之精不有至誠孰云斯感有廣平宋思禮字過

庭永州刺史昉之適孫戶部員外郎順之長子伶

集作知

丁偏露

集作  
罰

早喪慈母永懷鞠育之恩長增孺

集作  
思

慕

之痛弱不好弄長而能賢趨庭聞詩禮之風承宗勗曾

閔之行事後母徐氏至孝烝烝

集作以  
至孝聞

嘗恐

集無此  
二字

北

向興悲泣高堂而已暮

集作  
咎已

遂乃

集無此  
二字

南

集作  
東

遊下

位覬微祿以逮躬

集作  
親是

調露二年來佐百里俯就微班

之列將申返哺之情苟

集作  
敬

立身其若斯於從政乎何

有

集作  
遠

雖屬時多

集作  
歲

亢旱金石俱

集作  
行

銷環近川源

殆將涇絕濬井皆為湯谷通波盡化汙池而太夫人在

遲暮之年有溫勞之疾非濫漿不可以適口非源泉不

可以蠲疴膳

集作色

養既虧憂惶靡計

集作訴

俄而廳階之

側忽有清泉

集有而字

自生因疏導其源遂流注不竭味甘

若醴氣凜

集作冷

如冰此邑南控剡山北

集作地

連禹穴基

址多石岡阜無津爰自興建以來曾微穿汲之利非精

誠貫於至

集作有

道純孝

集作志

浹於無私

集作和非

孰能洽冥

既以通幽涌

集作導

泉源而致養者也昔漢臣忠烈窮井

飛于一時

集作言

姜婦孝思潛波移於七里靖

集作靜

惟陳

迹夫

集作  
彼

亦何人前

集作  
肅

縣尉柳冕耿介之士也道合

則金蘭若膠漆情隔

集作  
異

則軒冕猶埃塵片善可嘉朝

聞甘於夕殞

集作  
死

一諾猶重黃金賤於白珪以爲執友

素交豈祿利輕肥之謂也賞音達禮非鍾鼓玉帛之云

乎所耻者沒而無稱所貴者存乎不朽徒懷美志未遇

良才

集作  
材

賓王出贊荒隅途經勝壤三秋客懷長恨宋

玉之悲一面交歡暫雪桓譚之涕觀茲

集作  
斯

水之清泚

感若人之精誠見賢思齊仰珪璋而有地揮毫頌美鏤

琬琰而無慙廼作頌曰

粵若稽古厥初生人

集作民

人誰匪孝

集作其誰不孝

我獨踰

集作

難倫義不在

集作存

道人遺親愛敬盡力孝悌通神顧

思罔極

集作顧我思極

因心必

集作咸

至冥契動天甘泉湧地冷

冷無竭烝烝不匱曾是不

集作我

思永錫爾類爰有猗人

景行芳塵事諧則感道洽斯親情

集作孝

為禮王名是實

賓倘斯文之不墜知盛德之有鄰

大唐平陽郡龍角山慶唐觀大聖祖玄元皇帝

宮金籙齋頌

并序

崔元明

空洞之中溟滓之際靈文尚矣混成朕焉混成者何象  
帝之先靈文者何龍漢之年五劫交周尊神遞遷九氣  
列正無始常然治於流火之亭練於洞陽之館二儀得  
之以定位三景得之以發光赤明開圖碧落普度玄元  
奄有大道遂荒真宗天法之以無倪皇仰之而未及義  
軒應運堯舜乘時均至化而思齊酌玄風而始庶獨立  
千古湛兮若存首出百王悠兮不極矣粵若聖祖系襲

神宗先天不違後天繼代錫胤慶遠流派祥長國家纂  
戎欽承前烈三合一德六葉同道平陽郡玄元宮者興  
王之肇兆也惟初授命載告休徵權輿靈迹倣落祠宇  
昭張於國史乃今昇平永配嘉瑞增修清廟大建於闕  
宮明白於御碑因吾道為天下程由茲地為天下式非  
夫至道孰能與之哉皇帝御辨無為齊心正一寤寐有  
感髣髴真容昭孝孫之精誠貽烈祖之玄訓開元得聖  
象天寶獲靈符丕變再集而繁昌至教遂興而畢備祇



崇冊禮其高莫二袞龍克光於像設冕旒追尊於帝臨  
猗那商頌生民周雅儔之於昔今則過焉於鑠茲山會  
神之寓西對姑射北鄰天柱實通仙之秘府也正殿肅  
穆廣庭森沉峯巒左右松枯交陰總虛無以靜深也石  
壇重階瓴甍環甃隱訣參伍洞章護持三元表辰八月  
降誕每至是日展法於斯脩金籙齋啟玉帛印道家之  
寶王者之儀靡盛於此矣乃開乾門闔坤戶氣弘廣莫  
風和不周八卦行乎其中矣仰列宿攝魁罡落日淪陰

月時沉瀝六甲佐乎其旁矣仙侶順次羽人步虛朝拜  
九天醮祠五老想鈞陳則黃雲散覆存太一則白鶴來  
翔其餘侍香金童傳言玉女縹緲煙景徘徊元空求之  
希微宛如契合惟鎮皇極叶時邕外以廓清萬里戎夷

向化內以乂安兆庶年穀滋稔滅格擇

疑作格澤漢書  
天文志格澤者

如炎火之狀又見司馬相如  
大人賦格胡各反澤大各反

興昌光動植生成陰陽氣

茂利兵所措則戢干戈靈宮所臨則消疵癘矧感通上  
果神降其福景命來假天子萬年者乎觀主臣郭處寂

虔恭是勤夙夜匪懈稟師之錄佩之徽符躬執科儀爰  
謀法要開元十六載御題觀額因隸於茲二十五年上  
䟽議齊帝俞其請於是內使高真自王城而至綸音秘  
旨從天上而來諸侯肅臨郡邑歲事革故垣墉鼎新經  
像形彩艷艷金光熒熒曾是所營曾是有成利乎永真  
太守臣裴眺并寮屬等性道乎敬誼形于政奉敬休慶  
聚合觀徒衆等皆相與遵乃宗極體乎自然熙澹漠於  
元和扞恬愉於天順微臣嘗佐汾邑親覩聖蹤強名道

原用述真宰從窅冥而辨物因象罔而得之其詞曰

元氣之宗粵玄元始朱靈丙午赤明斯起太上道君託  
胎洪氏後天合德其惟我李爰初啟運符命歸唐海縣  
攸屬六葉重光天寶是應萬壽無疆大君推策考歷元  
陽空玄之中自然妙有無鞅之衆勃勃珠口迎不見前  
隨不見後外物雖變我法彌久龍角嵯峨肇興靈迹仙  
宮乃建清都伊宅洞裏天長寰中地隔皇矣大道臨下  
有赫金籙秘訣玉冊玄言陞壇之禮象法之門聖祖貽

訓來告孝孫於茲授命永保元元克昌厥後大慶常存  
刊此樂石以奉至尊

開元正歷握乾符頌

并序

張九齡

臣言伏見景寅制書以開元歷握乾符垂示天下幸甚  
其沙門玄侃等所言益部耆舊傳洛下閎改額頊歷推  
校最為精密而曰後八百歲其歷差一日當有聖人定  
之至于今歷果有差聖果有定誠非常之嘉應曠代之  
靈符不可得而間也臣誠歡誠喜臣聞天道先聖而啟

期聖人後天而奉時不當乎天心不在乎

集本川粹無乎字

厯

數不登乎聖道不合乎

二本無乎字

元符玄命定而王者應

幽數起而明者察故洛下閎極其數而知來者舊傳尚

其占而示後我皇帝無思而感自然玄同僧玄侃等幸

會而言豈云素慮非人事也其

集作非

神道也天固以

二本

巳作儲祥

一作祉

以俟時積分以差日出入數代多歷年所

疇人極力不能課其詳上林雜候亦莫徵其失則明天

意以俟

川文粹作候

聖期期數未臻乃藏於密聖證將至其

集作如

應如響彼幽深之何有此會

關

謀所以下協

黃鍾上稽玄象以和六氣以合三光復其見心間不容  
髮斗樞且運而況於人時元氣以調而況於月令於戲  
天下之動日用不知昆虫草木生者自遂麟鳳龜龍靈  
者自瑞蠻夷戎狄遠無不至山川神鬼幽罔不洎此聖  
人所以定天下之象通天下之志而聖人之道備也昔  
者河出圖洛出書自時厥後符命非一空文而無應其  
殆乎人為寔錄而有徵焉假集作乎龍負則洛下閎者

此其神乎不然是何見之明也夫聖有時而不作物無聖而不覩仲尼感時於鳳鳥古人歎壽於河清皆傷於不達而恨於難見我后受成命重光于集作乎文武累聖

而無窮殊祥而無數

集作極

彼衰命之君曾不得而朝聞

凡今之人誠何幸而目覩由是觀之當其來運唐虞之屋可封非其有時孔丘之徒不遇時也者千載之會也萬物豈知謝生於天乎兆人亦云忘力於帝乎微臣荷寵靈揚休命則臣子之志在于盡美而惟天之大終莫



能名不勝區區敢獻頌曰

於皇惟后受命于天時來于今兆見厥先既定乃日允

叶斯年赫赫光明應於上玄

集作以  
應上玄

開元歷

開本作開  
元正歷

不達

開本作  
不達

大終

開本作  
化天

潤州丹陽縣復練塘頌

并序

李華

大蜡之祭辭曰土反其宅水歸其壑先王因流下而導  
之故曰九川滌源因迤漚而瀦之故曰九澤既陂以疏  
天地之氣以利元元之用崇伯汨五行而殛羽山臺駘

障大澤而封汾川洪範首之春秋載之地有廣狹事無  
古今大江具區惟潤州其藪曰練湖幅員四十里菰蒲  
菱芡之多龜魚鱉蜃之生厭飫江淮膏潤數州其傍大  
族強家泄流為田專利上腴畝收倍鍾富劇淫衍自丹  
陽延陵金壇環地三百里數合五萬室或作家旱則懸耜  
水則具舟人惟其害九十餘祀凡經上司紛紛與予八  
十一斷嗚呼曲能掩直強者以得之老幼怨痛沉聲無  
告永泰元年王師大剪西戎西戎既斂矣生人舒息詔

公卿選賢良先除二千石以江南經用所資首任能者  
是歲十一月二十三日拜常州刺史京兆韋公損為潤  
州聲如飈馳先詔而至吏人畏伏男女相賀即日上無

貪刻下無冤憤公素知截湖開

一作閩

壤災甚螟蚤臨事

風生指期以復羣謗雷動山鎮恬然中明獨裁文之以

禮乃白本道觀察御史中丞韋公元甫

一作浦非

中丞撫手

一作掌 恢心如公之謀且曰興利除害得其人而後行非

常之政敢歸叔父公乃申戒縣吏卒徒闢之人不俟召

呼咸來

二字一作梓

從役畚鍤蓋野浚阜

一作浚阜

成溪

一作蹊

增

理故塘繚而合之廣湖為八十里象月之規儔金之固  
水復其所如鯨噀射洶洶隱地雷聞泉中先程三日若  
海之彌望灑灑如吞吐日月沉沉如韞蓄風雨所潤者  
遠原隰皆春耕者飽憂者泰於是䟽為斗門既殺其溢  
又支其澤沃瘠均品河渠通流商悅奠價人勇輸賦遐  
邇受利豈惟此州每歲萌陰乘陽二氣相薄大雨時行  
羣潦奔流水得一作勢所入盈而無傷龍見方雲稼蒙其

渥時前相國彭城公劉尚書晏統東方諸侯平其貢稅  
聞而悅之曰三事以聞詔書褒異焉彭城公宣命至江  
南捧詔授公公率元僚掾吏令丞以下至于耆艾西向  
拜手忻戴皇明人心上感天降嘉澤如有神祇昭協厥  
志公正直而和專靜而斷嫉惡宥過惠人察姦純鈞精  
堅百鍊不耗伐冰之貴降從士禮詩云靖恭爾位好是  
正直宜其享多此一字無福也吏人入賀公拱而謝之曰尚  
書劉公觀察韋公奉行王澤也鄙何力之有焉丹陽令

杜孟寅秉公之清白延陵令李令從如公之愛人金壇  
令胡玘稟公之成規及丹陽者壽周孝瓌百姓湧源等  
拜首而請曰允為澤允悅也水歸於澤而澤悅於人百  
年侵一作塞而公啟之臣哉隣哉克諧帝休永代是式  
三縣無災若不碣而刻之則命不揚於厥後後之人無  
以倚負也華嘗學古見訪為頌曰

望沄沄兮視冥冥鳥閑魚樂葭莖生膏腴利倍起訟爭  
斯人怨抑痛無聲韋公正直動神靈百年淤一作游淀為

溲清饑者飫兮病者寧詔書光寵恩濡榮劃然眊瞢復  
皎明追琢刻頌颺芳一作馨

玉版玄記頌

并序

于邵

草莽臣稽首獻頌曰臣聞殊祥大報者皇天無私慎終  
追遠者祖考來格皆上帝之所協德豈蒸人之克預也  
我皇帝陛下建皇極行大道體元以煦覆品物以陶運  
執斗柄而四序潛迴張地維而八埏至靜方四十載矣  
而天下大順巍巍乎其全功歟玄元皇帝陛下之烈祖

也寶慈儉以垂後昆法清淨而示教父

一作文

歷千百祀

而陛下道存妙有化洽無為動之太和寂以玄覽非得  
一而正乎陛下執大象敷玄宗聖祖儀刑於郡國景命  
紛紜於圖史者蓋百數矣開靈寶於分陝之郊克復明  
號形縞衣於隆聖之閣時庸展親探三華於丹墀之上  
近而得也想五利於滄波之外遠而治也故朴畧之初  
三五以降曾不敢以功階並也今太白山人李渾等斲  
因形動未假神遊初入緇帷之林忽變紫微之境古祠



之下猶龍肅然霽色雖澈於清霄榮光自分於白晝玄

宮咫尺仙衛徘徊接霓裳以受辭奉玉顏而專對光啟

王室宣昭祖孫方

一作寶

錄實而未弘緬逖聽而奚取申

命京畿採訪使戶部侍郎兼御史中丞王鈇發皇華而  
載馳望白雲之有處瞻仰如在真風宛同歷五洞之杳

冥尋一門之窳窳行前有會感而遂通石臺菡萏而特

秀玉版熒

一作焜

煌而自秘式傳無忽祇受不差天香氣

氤甘液浹洽陽烏抱戴而上燭卿雲交映而前引率皆

科斗之文時人無能之者陛下乃齋心服形絕聖棄知  
閒居於大庭之館遊夢於華胥之國而後攝外慮嚴天  
思捧玄記而納宸極洞一時而萬物覩其辭炳耀而有  
屬其義綿延而自久齊聖壽於日月恢國祚於宇宙上  
以和天下以洽神人臣不知其天之為大也如此遂  
下明詔百官荷億載之殊慶追六聖之遺謚既撰日以  
嚴配親大禘於闕宮鳴鑾以飭清蹕在聽臣又以開闢  
之後無以尚之於是文武百辟蠻夷君長泊黃縑老幼

各有等威雲趨玉闕而請曰陛下奉天之昭錫承祖之  
大命百王無以徵其符千載不復遇斯瑞崇累朝之德  
孝之大者掩至尊之美謙莫甚乎既而天聽未迴睿獎  
猶邈臣下罔知寢處黎人咸造勿褻而言曰天其或者  
以天下之物無可以稱陛下之德故纘戎徽號因聖祖  
以發明今陛下不得名之固非一時之所強名也書  
曰不臧厥臧人罔攸勸願陛下臧而勸之抑讓之至于  
三方霈然曰俞哉斯亦天之所俾也遂命稽皇典序國

儀韶獲作貂蟬進纂鴻猷而尊冊之明大訓而奉行之  
雷雨作解小大以正四靈在郊藪以待命三光出躔次  
而延澤豈祇羣臣之私乎率土之私乎臣生沐浴風欽  
承寶化百揆時叙空聞賡載之歌三階底平久著登封  
之頌伏以神功丕應澤潤生靈挹超代之範圍與下人  
之陰隲方軼於周王遊玉黃帝迎年豈與夫河東壽宮  
棧陽薦馨而已矣仲尼以舜禹之事丘不得預議者以  
方今之盛臣實預焉庶效采詩之典曾何萬分之一伏

獻頌曰

巖巖太白列僊是宅八會真歌三清羽客幽陰肅爽處

處靈

一作雲

迹皇唐上祖天大元君揮斥六合時乘五雲

貽厥景命昭我聖勲神靈宣功華芝獻壽薦錫玄記光  
資妙有五宇天長石臺地久億載新兆千齡古書字形

科斗臺狀芙蓉神力莫測象帝之初

一作則

烈烈遺謚清

廟崇之明明徽號我后尊之天授玉記惟皇之禎微臣

薦頌遊聖難名

巴州化成縣新移文宣王廟頌

并序

喬琳

或曰天生德於聖人是為文宣蒙以文宣之為聖人蓋其自生非天生耳夫道有精德有純禮有意樂有神四物幽贊百靈淳感特與天地位而成三故夫子之前未曾生夫子夫子之後不復有夫子宇宙古今倬惟一人謂天能生曷不能數生也故曰非天生耳河圖鳳鳥言其德梁木泰山言其用謙以况物物由我成且孔聖之

道恢張而天下理汙殺而天下亂觀其可以卜理亂也  
領徒三千博徒三萬桓文不足侔其衆夾谷之戮齊優  
兩觀之誅少正氣濫河岳精迴日月然而俯僂魯卿循  
循鄉黨行道救世不有其躬且唐堯五臣不無四凶周  
文十亂不無三叔孔徒萬數之內唯宰我怠於晝寢卜  
商短於假盖未聞庶其之奔佛肸之叛遺墟舊宅刺草  
不生則教之所入者深化之所弘者遠鏡懸象緯掌著  
興亡籌萬代於一筭爾我國家數教訓格以王者之禮

加徽號焉示明王果有宗也德位交叙以奉天時然三皇五帝迄于今春秋釋菜廟食千祀特惟夫子耳則冕旒袞服聖人之餘事封建褒崇有國之盛典化成縣令范陽盧沔純深貞特廉孝絜矩夏大旱偶有事於文宣公焚香至誠雷出自廟指觀倏忽霈然滂沱自下車數月有感輒應無方之神豈情於造物者乎可由而不知也以此項因祠宇荒僻垣墉頽圯懇聚樵牧褻瀆威靈公以必葺而未言頻假寢以夢聖隙地無聖此為新宮



曰衣冠禮樂不下庶人宣風布教職先令長出家財以  
資匠費督門吏以勤役工青襟黃髮更唱迭和掾爨雖  
舊而華魄惟新自甲至癸不及旬而功已集郡官畢賀  
百姓未知足見役不及人也君子曰盧侯以心感神以  
身律人可謂善政也已矣郡守楊公中和大雅聞善若  
驚悅而美之曰盧方辭滿不以家為出鍾離俸錢脩孔  
聖遺廟善政之餘地也僉曰都允哉梁國喬琳臺之作  
為新廟頌頌曰

殷之系聖周之斯文生我夫子世教之君六藝折衷三  
才更分視不可見聽不可聞登降既定天人大觀禮樂  
神鬼幽明協贊由之則理匪由則亂百王同流萬古彌  
渙夢奠既兆哲人其萎自家刑國廟貌思之周微唐興  
千祀于茲春秋祭菜俎豆其時維巴之南亦揭其宇盧  
公宰邑人之父母假一作  
僻匪我升堂陋彼環堵爰就爽塏  
長岡之下相協厥居作為新宇不日不月既葺且崇頌  
徒知歸發篋來同斯之未信此也求蒙時惟龍見人懼

虎魁寧丁我躬虞鞏是託戶庭之際雷霆震薄雨公及  
私是刈是穫廟既更矣歲既盈矣公之志思人亦勤止  
變此夷俗叅乎孔里學者行之造次於是

畋獲虎頌

并序

符載

虎在毛物有剛猛而為暴者也畋而獲之覩令施而士

勇者也且荆為澤國疆亘雲夢伐

一作戈

麇麇弋鴻鴈盖

便習也唯獲虎則異故大而張之六年冬十二月臘日  
甲辰節度使御史大夫樊公大畋于郢城脩軍禮也先

期之辰命者將宿帥將騎步兵五千盛陳於所舍之地  
越翌日朝陽始昇郊牧靜夷建大旆之彤彤抗高旌之  
萋萋無小無大千戟萬羽閃舒絢煥膠膈礮錯狀濤湧  
而波汨咸從公而觀之於是樹蘭防列轅門表旗鼓而  
卒伍縈紆遼蔓星陳鱗次中軍發號沸涓洄一作四起拉  
榛棘秘梗幢高垝埤踣一作塔健足剡驍翅脂染鳴鏑血  
湔飛幟或潰潰以狂顧或奔豚而滅地竭銳精以圖免  
雖絕脰而猶視士氣方雄乃縱火攻烈焰炎燒雲颺

風熒陰深巷蒼蒼鬱鬱蒙龍抃呼未終山平澤通其有冒鬱  
攸走煤爐蒙茸袒裼徒搏獨殺者不可勝道維明日復  
圍于龍山之北岡先是里人之訟乳虎為暴肆毒貪婪  
白晝族行圈阜無豕牛林麓絕樵蘇老幼愁恐極於兵  
寇既卜其穴乃大搜而取之爽氣凌厲士拗餘怒思與  
鬪死莫有異慮敲扣拍撲芟殺策劓洞篁篠之冥密剗  
蒙蔓之纍絡勢窮則搏鬪於莽下觀其怒氣之所狡憤  
迅軀之所騰跣鋸牙之所啾齧鉤瓜之所拏攫傑作人

立呀若箕張聲軒

一作  
轟

暴雷目爍爍炬爰有一人烏獲

之倫威鬱喬傑獠狡獷決憑髯奮怒毛豎皆裂罇長戟  
以撐拒乃匐身而掩及勢傾力絕四偃在地穿喉貫背  
爪有餘搏於是騰氣射虹蜺酣譟破山林耄老慶童幼  
抃淋瀝鼎負獻于公所公以為天稔其毒必將妊孕剖  
視其腹即獲乎四子矣於是迴鑣返旆校能計獲發府  
庫行飲勞賞功也大凡古者天子諸侯四時皆畋因畋  
以理兵先視其禮儀次察其號令後觀其坐作進退之


度有不用命者乃斬之以徇於衆焉武德脩備乃事蒐狩上以奉宗廟下以禮賓客其有肉不登俎材不中器則謂之不軌不物而君子譏之今大夫法先王之制順時序之氣展敬農隙大講戎事卒乘具文章明武脩也威儀肅行伍列禮盛也無逸飛無漏走令張也繫是三者備足焜耀况乎啟沉毅誅暴橫眈眈五虎斃在指顧是得不謂動合模範成堂堂之觀乎公常握文武之柄荷申甫之寄擁旄荆國星霜四周流愷悌之仁布大中

之化政之被民者如陽和熙熙蒸變生物各遂暢達不  
知其然故無得而稱焉洎於軍旅之際德禮也如是勇  
練也如是播此智畧寓諸形容因知公之師可以振文  
經可以翊皇威可以截不庭可以懾四夷與上古儔侶  
赫赫巍巍即豈獨躡荒山殪猛獸馳騁觸<sub>一作</sub>履<sub>一作</sub>左旋  
右抽而已哉載末儒也猥以縫掖獲陪鞭弭之後目覩  
盛烈失去畏懦敢愛文字使其闡然而不彰乎廼作頌

曰



玄陰凝兮殺氣厲揚三軍兮順時殺鋌戟羅兮山谷隘  
飛走殫兮林莽壞有虎勃起兮萬夫駭闕呀天矯兮雷  
霆唱紆沉慮兮振明戒于一奮兮傾五害旋勝軍兮翻  
大旆空臯藪兮樂幼艾勇毅之師無與對可誅不王截  
海外



文苑英華卷七百七十九